

Inatsisartut 2011-mi ilassutitut aningaasaliissutitut inatsisissaattut siunnersuut
(Aningaasaqarnermut Naalakkersuisoq)**Saqqummiussinermut allakkiaq**
(Aningaasaqarnermut Naalakkersuisoq)**Siullermeerneqarnera**

Matumuuna Naalakkersuisut sinnerlugit Inatsisartut 2011-mi ilassutitut aningaasaliissutitut inatsisissaattut siunnersuut saqqummiuppara. Missingersuusiortarneq pillugu inatsimmi § 26-mi aalajangersakkani allassimavoq ukiup aningaasaliiffiusup ingerlanerani aningaasaliissutit oqaasertaliussallu nutaat allanngortitalluunniit ilassutitut aningaasaliissutitut inatsimmut ukiumi tulluittumi saqqummiunneqartussami ilanngunneqartassasut.

Taamaalilluni Inatsisartut 2011-mi ilassutitut aningaasaliissutitut inatsisissaattut siunnersuut aningaasaleeqqinnermut inatsisut isigineqartariaqarpoq. Ilassutitut aningaasaliissutitut inatsisikkut Naalakkersuisut aningaasanut inatsimmut oqaasertaliussani piginnaatitsissutit Inatsisartullu Aningaasaqarnermut Ataatsimiititaliaata ukiumi aningaasaliiffiusumi 2011-mi aalajangeriigaat, tunngavigalugit aalajangiisimaneramik pissusissaatut inissiisoqarpoq.

Inatsisartut 2011-mi ilassutitut aningaasaliissutitut inatsisissaattut siunnersuuttip imarai ilanngussaq 1 aningaasaliissutit allannguutaannik 2011-mi akuersissutigineqartunik takutitsisoq aamma ilanngussaq 2 taamatuttaaq 2011-mi oqaasertaliussat allannguutaannik akuersissutigineqartunik takutitsisoq.

2011-mut Aningaasanut Inatsit aamma Inatsisartut 2011-mi ilassutitut aningaasaliissutitut inatsisissaattut siunnersuut ukiumi aningaasaliiviusumi 2011-mi aningaasaliissutitut tamarmiusunut takussutissaapput. Taamaalillutik Nunap Karsiata 2011-mi naatsorsuutaanut Inatsisartut ataatsimiinnermi matumani kingusinnerusukkut suliarisassaannut aallaaviupput.

Inatsisartut 2011-mut aningaasanut inatsisaat missingersuutini IST-mi 200,3 mio. koruuninik amigartooruteqarnissamik takutitsivoq. Inatsisartut Aningaasaqarnermut Ataatsimiititaliaata 2011-p ingerlanerani ilassutitut aningaasaliissutissat missingersuutini IST-mi amigartoorutissanik 189,6 mio. koruuninik amerlisitsisut akuersissutigereerpai. Taamaalilluni Inatsisartut 2011-mi ilassutitut aningaasaliissutitut inatsisissaattut siunnersuuttip kingunerissavaa ukiumi aningaasaliiffiusumi 2011-mi missingersuutini IST-mi 389,9 mio. koruuninik amigartooruteqartoqarnera.

Tamanna siullerpaamik peqquteqarpoq Qaqortumi, Tasiilami, Sisimiuni, Uummannami Aasiannilu kollegianik skolehjemminillu sanaartornissamut Peqqinnissaqarfimmilu utaqqisunik ikiliisaaniarnermut akileraarutigut immikkut ittunik isertitanik atuinissamik qinigaqarsimanerput. Taakku saniatigut ilassutitut aningaasaliissutit allat ataasiakkaat aningaasatigut matussutissaqartinneqanngitsut IST-mi amigartoornerit annertusinerannut peqqutaapput.

Taamatut oqaaseqarlunga Naalakkersuisut Inatsisartut 2011-mut ilassutitut aningaasaliissutitut inatsisissatut siunnersuutaat Inatsisartunut suliasanngortippara.